



22. Tschanteda da la suprastanza cumünela in mardi, ils 15.12.2015 a las 18.15 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan, Liun Quadri

Absaints:

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 0.212 Tscherna contabel cumünel
4. 0.400 Finanziaziun da l'organisaziun „Engadin St. Moritz Tourismus AG“
5. 7.900 Revisiun da l'uorden federel per biotops, consultaziun
6. 8.300 Dragonhorse-Holosana GmbH, concept da taxi cun charrozzas e chavals in Varusch, dumanda da reponderaziun decisiun dals 11.11.2015
7. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 24.11.2015 vain approvu unanimamaing.

169 Persunel Tscherna contabel cumünel

Sün la publicaziun da la piazza da contabel sun entredas 5 annunzchas. Zieva chi ho gieu lö ün'evaluaziun da las annunzchas e zieva chi haun gieu lö ils discuors da preschantaziun decida la suprastanza unanimamaing da tscherner a Mengia Maria Cuorad, da Samedan, respectivamaing da Lavin scu nouva contabla cumünela. Ella cumainza sieu impieghi tar nossa vschinauncha ils 01.05.2016.

170 0.400 Progets regiunels Finanziaziun da l'organisaziun „Engadin St. Moritz Tourismus AG“

La conferenza dals presidents cumünels da la nouva regiun Malögia decidan illa prosma tschanteda sur da l'organisaziun futura da la nouv'organisaziun „Engadin St. Moritz Tourismus AG“ chi vain alura suottamiss a las radunanzas cumünelas. La suprastanza cumünela vaiva piglio püssas voutas pusiziun da lascher la clef da spartiziun actuela e da desister sün la nouva clef da spartiziun, que our da motivs cha nossa vschinauncha

pajess bainquaunt dapü. Displaschaivelmaing nun ho la conferenza dals presidents cumünels resguardo las pretaisas fattas. Zieva animeda discussiun decida la suprastanza da suottastricher aunch'üna vouta las decisiuns fattas oriund.

**171 7.900 Planisaziun dal territori cumünel
Revisiun da l'uorden federel per biotops, consultaziun**

La suprastanza piglia cugnuschentscha da las actas in connex cun la revisiun da l'uorden federel per biotops. Zieva animeda discussiun decida la suprastanza unanimamaing da piglier seguaintamaing pusiziun: süls lös süts in differtents lös sün nos territori, sün la zona d'amfibias in Preda Dadour in Flin e sün la zona dad agnas planiseda lung l'ova da Varusch stu la Confederaziun desister.

**172 8.300 Turissem e cura
Dragonhorse-Holosana GmbH, concept da taxi cun charrozzas e
chavals in Varusch, dumanda da reponderaziun decisiun dals
11.11.2015**

La suprastanza vaiva decis in sia tschanteda dals 11.11.2015 da na sustgnair il concept da taxi cun charrozzas e chavals in Varusch da la firma Dragonhorse-Holsana GmbH da Chapella. Il motiv d'eira, cha la suprastanza nu pudaiva entrar sün las cundiziuns fattas. Uossa ho la firma Dragonhorse-Holsana GmbH inoltro üna dumanda da reponderaziun e comunicho, cha la dumanda a sieu temp nu d'eira formuleda güsta, ch'els nu vaivan l'intenziun da suottametter cundiziuns a la suprastanza cumünela, dimpersè be musser vi pussibiliteds per regler la chosa. Zieva animeda discussiun decida la suprastanza cun 4 cunter 0 vuschs da na entrar illa dumanda, siand chi nu sun gnidas avaunt maun novas conclusiuns. Duri Campell s'ho absanto per quista tractanda.

173 9.999 Varia

Il president orientescha, chi saja entreda üna denunzcha anonima d'ün abitant da S-chanf regard la spüerta da la firma chi spordscha viedis cun tschainas da raclette in charrozza e chi saja oblig d'ün permiss d'ustaria. La suprastanza suottastricha danouvmaing, cha sün chartas anonimas nu vain entro.

Inavaunt orientescha'l, cha'l departamaint federel per ambiaint, trafic, energia e comunicaziun ho comunicho, cha Jnes Barblan es gnida tschernida dal cussagl federel per la perioda d'uffizi 2016-2019 scu commembra da la cumischiun dal Parc Naziunel Svizzer. La suprastanza gratulescha ad Jnes Barblan per la tscherna onuraivla.

A las 19.20 vain la tschanteda alveda.

In buna fè

L'actuar:
D. Schwenninger